

MESYUARAT KEDUA, PENGGAL KETIGA
PARLIMEN KEEMPAT BELAS
2020

HARI SELASA : 28 JULAI 2020

JAWAPAN-JAWAPAN BAGI PERTANYAAN-PERTANYAAN JAWAB
LISAN YANG TIDAK DIJAWAB DI DALAM DEWAN
(SOALAN NO. 10 HINGGA NO. 40)

**PEMBERITAHUAN PERTANYAAN LISAN DEWAN RAKYAT
MESYUARAT KEDUA PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : TUAN PRABAKARAN A/L M PARAMESWARAN
[BATU]**

TARIKH : 28 JULAI 2020 (SELASA)

SOALAN

TUAN PRABAKARAN A/L M PARAMESWARAN [BATU] minta **MENTERI WILAYAH PERSEKUTUAN** menyatakan apakah inisiatif Kementerian bagi membantu usahawan kecil dan sederhana termasuk penjaja warganegara yang terjejas akibat Perintah Kawalan Pergerakan.

JAWAPAN

Tuan Yang Di Pertua,

Untuk makluman Yang Berhormat Batu, melalui Inisiatif Wilayah Cakna pada 26 Mac 2020, Dewan Bandaraya Kuala Lumpur (DBKL) telah melaksanakan 2 inisiatif bagi membantu penjaja dan peniaga kecil yang terkesan dengan arahan Perintah Kawalan Pergerakan (PKP) iaitu dengan meluluskan pengecualian sewa bagi tempoh 6 bulan bermula Mac hingga Ogos 2020 kepada penjaja dan peniaga kecil yang menyewa lot gerai di pasar dan pusat penjaja milik DBKL dan memberi bantuan sumbangan secara *one-off* Ehsan Covid-19 sebanyak RM500 kepada penjaja dan peniaga kecil di Wilayah Persekutuan Kuala Lumpur (WPKL).

Pengecualian sewa pasar atau pusat penjaja DBKL telah diberikan kepada 6,708 akaun sewa aktif dengan anggaran jumlah sewa dan caj perkhidmatan sebulan sebanyak RM1.45 juta. Anggaran jumlah keseluruhan pengecualian bagi tempoh 6 bulan adalah sebanyak RM8.75 juta.

Manakala, sumbangan bantuan kewangan sebanyak RM500.00 secara *one-off* diberikan kepada pelesen penjaja yang terdiri dari Bazaria, *Food Truck*, gerai tepi jalan, pasar malam, pasar terbuka, penjaja beredar, permit sementara, penjaja waktu terhad, pasar tani, pasar berbangunan, pusat penjaja awam dan swasta, gerai berkunci serta kiosk. Sehingga 30 Jun 2020, nilai sumbangan yang telah dikreditkan atau dituntut adalah sebanyak RM8.57 juta melibatkan 17,148 penjaja dan peniaga kecil.

Untuk makluman Tuan Yang Di Pertua dan Ahli-Ahli Yang Berhormat jua, DBKL turut memberi peluang kepada warga Kuala Lumpur dalam sektor penjajaan dengan mengeluarkan Permit Sementara Penjaja Waktu Terhad Perintah Kawalan Pergerakan Pemulihan (PKPP). Syarat-syarat permit sementara Penjaja Waktu Terhad sedia ada telah ditambah baik bagi memudahkan warga kota mencari rezeki dalam tempoh PKPP di

SOALAN NO : 10

samping terikat dengan pematuhan SOP dalam norma baharu. Permit Sementara Waktu Terhadap PKPP adalah diluluskan bagi tempoh 3 hingga 6 bulan. Penjaja diberi pilihan sama ada berniaga antara:-

- 1) Sesi pagi bermula jam 7.00 pagi hingga 10.00 pagi;
- 2) Sesi tengahari bermula jam 11.00 pagi hingga 2.00 petang;
- 3) Sesi petang bermula jam 4.00 petang hingga 7.00 malam;atau
- 4) Sesi malam bermula jam 7.00 petang hingga 12.00 malam.

Kadar bayaran Permit Sementara Penjaja Waktu Terhadap PKPP adalah seperti berikut;

- 1) RM20.00 sebulan bagi penjaja sementara statik gerai tepi jalan;
- 2) RM62.00 sebulan bagi penjaja sementara beredar (bonet kereta);dan
- 3) RM3.00 pelekat penjajaan (perlu diletak di atas alas meja dan mudah dilihat).

Jumlah penjaja yang telah diberi kelulusan Permit Sementara Penjaja Waktu Terhadap PKPP sehingga 9 Julai 2020 adalah 69 penjaja.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA
PARLIMEN KEEMPAT BELAS (2020)**

PERTANYAAN : LISAN

DARIPADA : YB DATUK MOHAMAD BIN ALAMIN [KIMANIS]

TARIKH : 28 JULAI 2020 (SELASA)

SOALAN

Minta **PERDANA MENTERI** menyatakan apakah pelan strategik Kerajaan untuk memastikan Kelas Fardhu Ain dan Fardhu Kifayah (KAFA) agar terus relevan dan menjadi instrumen penting dalam memastikan anak-anak mendapat didikan agama yang mencukupi.

DIJAWAB OLEH :

**YB DATUK SENATOR DR. ZULKIFLI MOHAMAD AL-BAKRI
MENTERI DI JABATAN PERDANA MENTERI
(HAL EHWAL AGAMA)**

JAWAPAN

Tuan Yang di-Pertua,

Untuk makluman Yang Berhormat, Pendidikan Kelas Al-Quran dan Fardhu Ain (KAFA) merupakan produk Jabatan Kemajuan Islam Malaysia (JAKIM) sejak 1990 dalam menyediakan pendidikan asas Islam yang bersistematik dan dilaksanakan secara formal kepada anak-anak peringkat rendah supaya generasi akan datang mempunyai jati diri yang utuh dan berakhlak tinggi selaras dengan ajaran Islam.

Melalui Pelan Strategik JAKIM 2019-2025 di bawah Teras 3: Strategi 2 iaitu memperkasakan Pendidikan KAFA menerusi 4 aspek iaitu kurikulum, buku teks, pentaksiran dan latihan keguruan. Melalui Strategi 3 pula aspek penghayatan nilai dan adab dalam Pendidikan Islam diperkasakan dengan membangunkan dan melaksanakan modul nilai dan adab bagi murid KAFA. Kurikulum baharu KAFA dibina bagi memenuhi keperluan Pendidikan Islam secara *hands-on* selaras dengan keperluan Falsafah Pendidikan Kebangsaan yang diperkenalkan dalam sistem pendidikan negara.

Mulai tahun 2020, JAKIM telah melaksanakan kurikulum baharu dan menyeragamkan buku teks KAFA bagi penyeragaman pengajaran dan pembelajaran KAFA di seluruh negara. Melalui dapatan Kajian Keberkesanan Pelaksanaan KAFA, penambahbaikan kurikulum baharu lebih menumpukan kepada aspek adab dan nilai menerusi pendekatan penghayatan, pembudayaan ilmu dan merentas kurikulum. Oleh kerana minat masyarakat terhadap tahfiz, mata pelajaran Tahfiz Al-Quran diperkenalkan sebagai pendedahan awal kepada kanak-kanak di peringkat rendah.

Selain itu, JAKIM akan terus bekerjasama dengan Kementerian Pendidikan Malaysia (KPM) dalam merealisasikan pendidikan KAFA sebagai pendidikan arus perdana. Di samping itu juga, KPM turut berperanan sebagai penyedia premis dan prasarana yang kondusif untuk pelaksanaan pendidikan KAFA.

Kerajaan melalui JAKIM akan terus komited membangunkan perancangan bagi memastikan pendidikan KAFA agar terus relevan dan menjadi instrumen penting dalam memastikan anak-anak mendapat didikan agama yang mencukupi.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI DR. HAJI DZULKEFLY BIN
AHMAD [KUALA SELANGOR]**

TARIKH : 28 JULAI 2020 (SELASA)

SOALAN

DATUK SERI DR. HAJI DZULKEFLY BIN AHMAD [KUALA SELANGOR] minta **MENTERI KESIHATAN** menyatakan status terkini pelaksanaan sistem Rekod Kesihatan Elektronik atau *Electronic Medical Records* (EMR) dalam menyimpan maklumat pesakit dan rekod sejarah perubatan di hospital-hospital Kerajaan seluruh negara. Seterusnya apakah pelan Kerajaan hari ini dalam melaksanakan sistem digital ini keseluruhan hospital dan klinik kesihatan dan tidak tertumpu kepada beberapa buah hospital sahaja.

JAWAPAN

Tuan Yang di-Pertua,

1. Pada masa ini, Sistem Rekod Kesihatan Elektronik atau *Electronic Medical Records* (EMR) **telah dilaksanakan di 37 daripada 146 buah** hospital Kerajaan, iaitu bersamaan dengan 25%. Bagi klinik kesihatan pula, **sebanyak 97 daripada 1,090 buah klinik kesihatan**, bersamaan dengan 9% telah dilaksanakan sistem tersebut. Dengan penggunaan sistem ini, **data mengenai pesakit dijana dan disimpan secara digital** dan bukan lagi di atas kertas. Ini dapat **meningkatkan kecekapan dalam pengurusan maklumat** pesakit disamping **mengurangkan keperluan ruang** untuk menyimpan rekod-rekod perubatan.

2. Selain itu, Kementerian Kesihatan juga telah membangunkan satu (1) platform **Health Information Exchange** (HIE) yang dikenali sebagai MyHix. Melalui platform ini **maklumat kesihatan pesakit boleh dikongsikan antara fasiliti kesihatan** dengan **mudah, cepat** dan **selamat**. Sehingga kini, 10 buah hospital dan sebuah klinik kesihatan telah berintegrasi dengan platform ini.

3. Walaupun usaha untuk membangunkan sistem EMR ini telah dimulakan sejak 3 dekad lalu, kemajuan yang dicapai sehingga kini masih rendah. **Cabaran utama yang dihadapi adalah perubahan teknologi yang pantas** serta **kekangan untuk mendapatkan dana yang mencukupi**. Namun, Kementerian Kesihatan Malaysia (KKM) terus beriltizam untuk memperluaskan perlaksanaan sistem EMR ini di semua fasiliti kesihatan Kerajaan seluruh negara.

Tuan Yang di-Pertua,

4. Pada tahun ini, Kementerian Kesihatan telah diluluskan peruntukan untuk Projek Perintis Perluasan Sistem EMR yang akan melibatkan 9 buah hospital daerah dipelbagai negeri. Selepas dipertimbangkan semula, Kementerian Kesihatan telah memutuskan untuk meminda projek tersebut kepada Projek Perlaksanaan *Electronic Medical Record* (EMR) Kebangsaan Fasa 1.

5. Cadangan pelaksanaan Projek EMR Kebangsaan **Fasa 1** ini akan melibatkan keseluruhan fasiliti kesihatan Kerajaan di **Negeri Sembilan** merangkumi **7 buah hospital**, **44 buah klinik kesihatan** dan **12 buah klinik pergigian**. Sistem EMR di setiap fasiliti tersebut akan diintegrasikan melalui platform perkongsian MyHix yang turut akan ditambahbaik. Melalui pendekatan menyeluruh sebegini, adalah diharapkan hasrat untuk membangunkan Indeks Utama Pesakit (*Master Patient Index*) dan Rekod Sepanjang Hayat (*Lifetime Health Record*) dapat direalisasikan. Selain itu, pelaksanaan Fasa 1 ini juga akan turut mengambil kira keperluan perkhidmatan tambahan seperti Temujanji dan Pendaftaran pesakit Atas Talian, Pembayaran Elektronik (*e-Payment*) dan Konsultasi Secara Maya (*Virtual Consultation*).
6. Bagi peluasan pelaksanaan EMR keseluruh negara, ianya akan tertakluk kepada keberhasilan pelaksanaan Fasa 1 dan juga model pembiayaan projek yang akan dikenalpasti kemudian.

Sekian, terima kasih.

PEMBERITAHUAN PERTANYAAN
DEWAN RAKYAT MALAYSIA
PENGGAL KETIGA, MESYUARAT KEDUA 2020

PERTANYAAN : LISAN

DARIPADA : YB TAN KOK WAI [CHERAS]

TARIKH : 28 JULAI 2020

SOALAN

TUAN TAN KOK WAI [CHERAS] minta **MENTERI PERDAGANGAN ANTARABANGSA DAN INDUSTRI** menyatakan bidang industri yang dikira sebagai mempunyai nilai, teknologi dan impak yang tinggi, dan juga bidang industri yang dikategorikan sebagai berteknologi rendah, intensif buruh dan bernilai rendah yang tidak digalakkan oleh Kerajaan.

JAWAPAN

Tuan Yang di-Pertua,

1. Setiap industri di Malaysia mempunyai impak terhadap ekonomi Negara daripada segi pemindahan teknologi, peluang pekerjaan untuk rakyat tempatan, gantian import dan menjana nilai eksport yang tinggi.
2. Berdasarkan Rancangan Malaysia ke-Sebelas (RMK-11), sektor perkilangan yang mempunyai kesan penggandaan atau dengan izin, *multiplier effect* yang tinggi merupakan industri elektrik dan elektronik (E&E), bahan kimia dan produk kimia, jentera dan peralatan, peralatan perubatan dan aeroangkasa.
3. Bagi sektor perkhidmatan, antara industri yang diberi penekanan kerana menyediakan tenaga kerja berkemahiran, menjalankan aktiviti bernilai tambah yang tinggi, serta menyokong pertumbuhan industri pembuatan yang berkaitan adalah industri rekabentuk dan pembangunan, penyelidikan dan pembangunan, ujian/penentukuran, perkhidmatan senibina/kejuruteraan, penyedia latihan teknikal dan kemahiran, perkhidmatan logistik (3PL), penyedia solusi ICT yang berkaitan dengan automasi dan industri 4.0 dan projek teknologi hijau bersepadu.
4. Kerajaan memahami bahawa terdapat industri-industri tertentu yang masih berintensifkan buruh dan mempunyai tahap kepenggunaan teknologi yang rendah. Di antara industri tersebut adalah industri berasaskan getah, plastik, tekstil dan pakaian, serta perabot. Sehubungan dengan itu, Kerajaan telah memperkenalkan Dasar Industri 4.0 iaitu *Industry4WRD* bagi menggalakkan industri-industri ini mempertingkatkan penggunaan teknologi 4.0 dalam proses pembuatan dan pengurusan syarikat.
5. Syarikat-syarikat tempatan akan dapat menghasilkan produk yang lebih kompleks, berkualiti dan kompetitif daripada segi kos disebabkan produktiviti yang meningkat. Program Penilaian Kesiapan (RA) serta Program Intervensi disediakan oleh Kementerian Perdagangan Antarabangsa dan Industri dimana pihak industri terutamanya industri

SOALAN NO : 14

kecil dan sederhana (IKS) dapat memohon geran untuk penilaian kesediaan mengaplikasikan teknologi 4.0 serta geran padanan sehingga RM500,000 untuk perolehan teknologi tersebut.

6. Insentif pengecualian cukai menerusi Elaun Modal Automasi juga disediakan bertujuan untuk memacu inisiatif automasi terutamanya untuk industri yang bergantung kepada tenaga kerja asing.

7. Kerajaan Malaysia sentiasa mengalu-alukan pelaburan langsung tempatan mahupun asing, iaitu pelaburan yang berkualiti daripada segi penyediaan peluang pekerjaan berpendapatan tinggi, melibatkan pemindahan teknologi, mempunyai aktiviti R&D, penggunaan sumber tempatan serta menambah nilai kepada rantai bekalan tempatan dan antarabangsa.

8. Aktiviti-aktiviti yang menyebabkan pencemaran alam sekitar, mengancam kesihatan dan keselamatan penduduk tempatan dan memberi impak negatif terhadap sosioekonomi Negara adalah tidak digalakkan oleh Kerajaan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : TUAN LUKANISMAN BIN AWANG SAUNI
[SIBUTI]**

TARIKH : 28 JULAI 2020 (SELASA)

SOALAN

TUAN LUKANISMAN BIN AWANG SAUNI [SIBUTI] minta **MENTERI KESIHATAN** menyatakan apakah status terkini cadangan pembinaan klinik kesihatan di tapak tanah hak milik Kementerian Kesihatan di Sepupok Niah dan adakah Kementerian akan menyenaraikan bina semula Klinik Kesihatan Bekenu yang terletak di pusat pentadbiran daerah Subis dalam Rancangan Malaysia ke-12.

JAWAPAN

Tuan Yang di-Pertua,

1. Buat masa ini penduduk Batu Niah dan Sepupok boleh mendapatkan perkhidmatan kesihatan di Klinik Kesihatan Batu Niah dan Klinik Komuniti Sepupok. Kementerian Kesihatan Malaysia (KKM) sedia maklum akan keperluan penduduk Sepupok Niah. Sehubungan itu, Kementerian Kesihatan **akan mengemukakan permohonan pembinaan Klinik Kesihatan Sepupok** yang baharu dalam Rancangan Malaysia Ke Dua Belas (RMK-12). Cadangan pembinaan Klinik Kesihatan Sepupok baru ini juga akan dapat menyediakan perkhidmatan kesihatan kepada penduduk berdekatan seperti di Batu Niah.
2. Klinik Kesihatan Bekenu pula merupakan sebuah klinik kesihatan yang telah menjalani beberapa **penambahbaikan**. Terbaharu, **perkhidmatan makmal perubatan** disediakan di Klinik Kesihatan Bekenu untuk menambah mutu perkhidmatan di klinik berkenaan.
3. Dengan kedatangan harian sebanyak 100 orang, Kementerian Kesihatan berpandangan **Klinik Kesihatan Bekenu masih mampu menampung keperluan perkhidmatan kesihatan penduduk-penduduk sekitarnya**. Kementerian Kesihatan akan sentiasa memantau keperluan penduduk bagi memastikan perkhidmatan kesihatan yang berkualiti. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : TENGKU ZULPURI BIN RAJA PUJI [RAUB]

TARIKH : 28 JULAI 2020

SOALAN

YB TENGKU ZULPURI BIN RAJA PUJI [RAUB] minta **PERDANA MENTERI** menyatakan projek-projek infrastruktur Rancangan Malaysia Ke-11 (RMKe-11) dan tahap kemajuan di Pantai Timur Semenanjung Malaysia.

JAWAPAN : YB DATUK SERI MOHD REDZUAN YUSOF
MENTERI DI JABATAN PERDANA MENTERI (TUGAS-TUGAS KHAS)

Tuan Yang di-Pertua,

Dalam tempoh RMKe-11 iaitu dari tahun 2016 hingga 2020, sebanyak 1,301 projek infrastruktur dengan kos RM65 bilion dilaksanakan di negeri-negeri Pantai Timur iaitu Kelantan, Terengganu dan Pahang di mana sebanyak 517 projek telah siap dan 784 projek dalam pelbagai peringkat pelaksanaan. Ringkasan jumlah dan kos projek mengikut negeri adalah seperti berikut:

Bil.	Negeri	Bilangan Projek Infrastruktur	Kos Projek (RM Bilion)
1.	Kelantan	415	18.53
2.	Pahang	483	26.56
3.	Terengganu	403	19.77
Jumlah		1,301	64.87

Sumber: Maklumat dijana daripada Sistem Pemantauan Projek II (SPPII) pada 10 Julai 2020

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : YB TUAN KARUPAIYA A/L MUTUSAMI
[PADANG SERAI]**

TARIKH : 28 JULAI 2020

SOALAN

YB TUAN KARUPAIYA A/L MUTUSAMI [PADANG SERAI] minta **PERDANA MENTERI** menyatakan memberi perhatian terhadap isu di mana segelintir masyarakat Malaysia tidak mengguna atau mempamerkan Jalur Gemilang dan lambang-lambang rasmi yang lain dengan betul. Apakah usaha Kementerian dalam mengatasi isu tersebut.

JAWAPAN: **YB DATUK SERI MOHD REDZUAN YUSOF**
MENTERI DI JABATAN PERDANA MENTERI
(TUGAS-TUGAS KHAS)

Tuan Yang di-Pertua,

1. Untuk makluman Ahli Yang Berhormat, Kerajaan telah mewujudkan Akta 414 iaitu Akta Lambang Dan Nama (Mencegah Penggunaan Tidak Wajar) 1963 untuk mengawal penggunaan Jalur Gemilang dan lambang-lambang rasmi yang lain. Penguatkuasaan Akta 414 dilaksanakan di mana individu yang didapati menyalahgunakan Jalur Gemilang dan lambang-lambang rasmi jika disabitkan kesalahan boleh dikenakan denda tidak melebihi RM20,000.00 atau dipenjarakan tidak melebihi tiga tahun atau kedua-duanya sekali.

2. Pada masa yang sama, Kerajaan juga melaksanakan pelbagai program kesedaran untuk memberi pendidikan kepada masyarakat dan menyebarkan mesej menghormati simbol kebesaran negara, tatacara pemasangan bendera dan cara menghormati Jalur Gemilang.
3. Antara lain, program kesedaran ini dilaksanakan melalui kaedah hebahan secara bersemuka seperti Program Info On Wheels (IOW) Merdeka yang dirancang untuk diadakan sebanyak 130 program di 384 lokasi di seluruh negara bermula bulan Julai hingga Ogos 2020.
4. Selain itu, Kerajaan juga mengadakan program Bulan Kebangsaan dan Kibar Jalur Gemilang yang dilaksanakan pada setiap tahun bagi membangkitkan rasa bangga rakyat Malaysia untuk mengibarkan Jalur Gemilang. Di antara program Bulan Kebangsaan ialah Merdeka @ Komuniti yang merupakan program bagi menyuntik kesedaran awal kepada rakyat mengenai sambutan Bulan Kebangsaan, meningkatkan dan menggelorakan semangat patriotik dan cintakan negara serta memberi penjelasan mengenai penggunaan lambang-lambang rasmi mengikut tatacara yang betul di semua peringkat di seluruh negara; dan
5. Pelaksanaan program-program tersebut oleh Kerajaan juga memberi penjelasan mengenai tatacara pemasangan bendera dan cara menghormati Jalur Gemilang.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : YANG BERHORMAT DR. ONG KIAN
MING [BANGI]**

TARIKH : 28 JULAI 2020

SOALAN

DR. ONG KIAN MING [BANGI] minta **MENTERI PERDAGANGAN ANTARABANGSA DAN INDUSTRI** menyatakan tentang kemungkinan perjanjian Regional Comprehensive Economic Partnership (RCEP) akan ditandatangani oleh semua negara perunding dan apakah pendirian Kerajaan ini mengenai Comprehensive and Progressive Agreement for Trans Pacific Partnership (CPTPP).

JAWAPAN

Tuan Yang di-Pertua,

1. Negara-negara ASEAN telah memeterai Perjanjian Perdagangan Bebas atau dengan izin, Free Trade Agreement (FTA) iaitu FTA ASEAN Plus 1, dengan 6 negara rakan dialog ASEAN masing-masing iaitu Republik Rakyat China pada tahun 2005, Republik Korea pada tahun 2007, Jepun (2008), India (2010) serta Australia dan New Zealand pada tahun 2010. ASEAN dan 6 rakan-rakan dialog tersebut kemudiannya telah bersetuju untuk merundingkan satu FTA tunggal yang melibatkan kesemua negara berkenaan yang dikenali sebagai Perjanjian Regional Comprehensive Economic Partnership atau singkatannya, RCEP. Keputusan ini tercapai sewaktu Persidangan Kemuncak ASEAN ke-21 yang telah dianjurkan pada tahun 2012 di Cambodia.
2. Untuk makluman, sebanyak 28 pusingan rundingan telah diadakan sejak bulan Mei 2013 sehingga bulan September 2019. Selepas pusingan ke-28 dan pada Sidang Kemuncak RCEP ke-3 pada bulan November 2019, kesemua 20 Bab yang terkandung dalam Perjanjian ini telah berjaya dimuktamadkan kecuali beberapa perkara teknikal berkaitan dengan rundingan akses pasaran serta perkara-perkara yang melibatkan negara India.
3. Pada tahun ini, sebanyak 3 mesyuarat maya (*Virtual Meeting*) di peringkat Ketua Perunding atau dengan izin, *Trade Negotiation Committee*, telah diadakan iaitu pusingan ke-29 dari 20 hingga 24 April 2020, pusingan ke-30 dari 13 hingga 20 Mei 2020 dan mesyuarat khas pada 10 dan 11 Jun 2020. Mesyuarat-mesyuarat ini bertujuan untuk memuktamadkan beberapa isu tertunggak yang telah disebutkan sebelum ini.
4. Menteri-menteri perdagangan dan industri negara-negara ahli RCEP telah bermesyuarat pada Mesyuarat Maya Inter sesi RCEP Ke-10 Peringkat Menteri pada 23 Jun yang lalu. Keputusan yang dicapai, antara lain, ialah untuk meneruskan usaha mengajak India kembali ke meja rundingan. Mesyuarat Jawatankuasa Perunding atau *Trade Negotiating*

Committee (TNC) ke-31 pada 9 Julai 2020 yang lalu, telah bersetuju menubuhkan RCEP TROIKA yang diwakili tiga buah negara iaitu Indonesia sebagai negara penyelaras perjanjian RCEP, Viet Nam selaku tuan rumah ASEAN pada tahun ini dan Jepun selaku *ASEAN FTA Partners (AFP) facilitator* dengan izin, untuk berbincang dengan negara India.

5. Malaysia berpandangan penyertaan India dalam RCEP akan membawa manfaat daripada segi akses pasaran tambahan bagi perdagangan barangan. Jika dibandingkan dengan 2 perjanjian perdagangan bebas (FTA) sedia ada iaitu ASEAN-India FTA (AIFTA) dan Malaysia-India Comprehensive Economic Cooperation Agreement (MICECA), tahap liberalisasi pasaran India dalam dua FTA tersebut adalah hanya 75 peratus manakala penawaran terakhir liberalisasi pasaran India untuk RCEP telah mencapai 89 peratus.

6. Walaupun demikian, sekiranya India masih tidak mampu menyertai RCEP menjelang tarikh menandatangani RCEP yang disasarkan pada November 2020 kelak, Malaysia masih boleh meneruskan menandatangani Perjanjian RCEP dengan 14 negara yang lain.

7. Ini kerana Malaysia masih boleh berunding dengan India melalui kajian semula perjanjian ASEAN-India FTA untuk mendapatkan akses pasaran ke India yang lebih baik setelah RCEP dimuktamadkan dan ditandatangani.

Tuan Yang Dipertua,

8. Izinkan saya menyentuh pula pertanyaan berkaitan Perjanjian Komprehensif dan Progresif bagi Perkongsian Trans-Pasifik, atau dengan izin, *Comprehensive and Progressive Agreement for Trans-Pacific Partnership* (CPTPP). Seperti yang kita maklum, Perjanjian CPTPP telah mula berkuatkuasa pada 30 Disember 2018 bagi Australia, Kanada, Jepun, Mexico, New Zealand, dan Singapura; dan pada 14 Januari 2019 bagi Viet Nam.

9. Empat (4) negara anggota lain pula yang telah menandatangani Perjanjian ini tetapi belum melengkapkan proses ratifikasi termasuk

Malaysia, tidak perlu melaksanakan komitmen Perjanjian CPTPP. Pada masa yang sama juga, segala manfaat dari Perjanjian ini tidak dapat dinikmati oleh Malaysia dan 3 negara lain tersebut iaitu Brunei Darussalam, Chile dan Peru.

10. Sebagaimana Ahli-ahli Dewan yang mulia ini sedia maklum, Perjanjian CPTPP merupakan satu perjanjian perdagangan bebas (FTA) yang komprehensif dan menyentuh bidang-bidang baharu seperti *Investor-State Dispute Settlement* (ISDS), Syarikat Milikan Kerajaan (*State Owned Enterprise* - SOE) dan Perolehan Kerajaan. Justeru, Kerajaan masih belum menetapkan bilakah Perjanjian ini akan diratifikasi oleh Malaysia. Pemahaman yang menyeluruh mengenai Perjanjian ini termasuk oleh pemegang taruh dan Kerajaan Negeri adalah perlu sebelum Perjanjian CPTPP diratifikasi dan seterusnya dilaksanakan oleh Malaysia. Pada masa yang sama, Kerajaan juga mengambil maklum bahawa negara-negara seperti United Kingdom (UK) dan Thailand telah menunjukkan minat untuk menyertai Perjanjian CPTPP.

11. Maka, pada masa ini, MITI, Jabatan Peguam Negara serta Kementerian-kementerian berkaitan giat melaksanakan sesi libat urus untuk memastikan sebarang keputusan yang dibuat oleh Malaysia kelak akan memberi manfaat kepada negara dan rakyat.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : DATO' HAJI AHMAD NAZLAN BIN IDRIS
[JERANTUT]**

TARIKH : 28 JULAI 2020 (SELASA)

SOALAN

DATO' HAJI AHMAD NAZLAN BIN IDRIS [JERANTUT] minta **MENTERI KESIHATAN** menyatakan:

- (a) berapa jumlah kos yang ditanggung Kementerian bagi membendung penularan dan merawat pesakit wabak COVID-19 dan
- (b) perancangan Malaysia bagi membangunkan sistem tersendiri seperti Amaran Kedudukan Sistem Tindak Balas Perebakan Penyakit (DORSCON) seperti Singapura.

JAWAPAN

Tuan Yang di-Pertua,

1. Sehingga kini, Kementerian Kesihatan Malaysia (KKM) telah membelanjakan sebanyak **RM650 juta** (10 Julai 2020) bagi pembelian peralatan, bekalan perubatan, barangan guna pakai (*consumables*)/ *Personal Protective Equipment* (PPE), *test kit* dan lain-lain perkhidmatan dalam usaha mengawal wabak COVID-19. Kerajaan akan sentiasa memastikan peruntukan yang mencukupi dalam memastikan wabak COVID-19 dapat diuruskan dengan baik dan terkawal.

2. **Disease Outbreak Response System Condition** atau lebih dikenali sebagai **DORSCON** yang dibangunkan oleh Kerajaan Singapura, merupakan pendekatan yang menggunakan kod warna (iaitu hijau, kuning, oren dan merah) bagi menjelaskan mengenai situasi semasa kejadian suatu wabak penyakit yang dikenalpasti. Seterusnya, ia menggariskan mengenai tindakan yang perlu diambil bagi mencegah dan mengurangkan impak kesan dari penularan wabak penyakit tersebut.

3. Di Malaysia, pendekatan serupa turut digunakan oleh pihak Kementerian Kesihatan dan ianya dikenali sebagai **Disease Outbreak Response Matrix Malaysia (DORMM)**. Namun, ia tidak menggunakan kod warna tetapi sebaliknya menggunakan aturan nombor dari 1 hingga 4 seperti berikut:

(i) Nombor 1 bagi Fasa Amaran (*Alert Phase*)

Fasa ini adalah apabila kejadian jangkitan berlaku khususnya di luar negara dan masih belum ada kes dikesan di Malaysia. Begitu juga, penyakit ini mempunyai gejala ringan (*mild*) atau ia mempunyai gejala yang teruk (*severe*) tetapi mempunyai keupayaan penularan jangkitan yang sangat terhad dari seorang individu kepada seorang individu yang lain. Pada fasa ini, aktiviti-aktiviti yang dilaksanakan melibatkan pengukuhan tahap kesiapsiagaan negara bagi menangani potensi importasi jangkitan tersebut ke Malaysia;

(ii) Nombor 2 bagi Fasa Pembendungan Awal (*Early Containment Phase*)

Fasa ini bermula sebaik sahaja jangkitan tersebut dikesan berlaku di Malaysia dan perlu ditangani dengan segera dari mengelakkan ia dari merebak dalam kalangan masyarakat setempat. Begitu juga, jika dinilai daripada sifat penyakit tersebut, fasa ini adalah melibatkan jangkitan yang mudah menular dari seorang individu kepada seorang individu yang lain yang berlaku di luar negara, tetapi kes sporadik mahupun penularan dalam masyarakat Malaysia masih belum dilaporkan berlaku.

(iii) Nombor 3 bagi Fasa Pembendungan Akhir (*Late Containment Phase*)

Pada fasa ini, penularan jangkitan tempatan telah berlaku di Malaysia. Gejala jangkitan yang dikesan adalah ringan (*mild*) pada kebanyakan individu, namun berpotensi untuk menjadi teruk (*severe*) hingga menyebabkan komplikasi pada golongan yang berisiko tinggi seperti kanak-kanak, wanita hamil, warga emas dll. Namun begitu, penularan jangkitan dalam kalangan masyarakat setempat masih mampu dibendung dan dikawal dari terus menular dengan menggunakan kapasiti perubatan serta kesihatan sedia ada.

(iv) Nombor 4 bagi Fasa Mitigasi (*Mitigation Phase*)

Pada fasa ini, penularan jangkitan tempatan telah berlaku dengan meluas dalam kalangan masyarakat setempat. Justeru, aktiviti-aktiviti yang dilaksanakan semasa fasa ini bertujuan untuk meredakan impak kesan daripada penularan secara meluas yang telah berlaku. Kaedah perawatan pada fasa ini juga mungkin tidak lagi bersifat kebolehcapaian oleh semua lapisan masyarakat, tetapi berdasarkan suatu kerangka keutamaan yang perlu dibangunkan ketika itu melalui penilaian situasi semasa.

4. Untuk makluman, DORMM digunakan sebagai panduan khusus bagi pihak Kementerian Kesihatan untuk merancang tindakan susulan yang ingin dilaksanakan sepanjang menangani suatu kejadian wabak jangkitan. Ia juga merupakan suatu tatacara yang dipenuhi dengan elemen-elemen teknikal. Justeru, perkongsiannya dengan masyarakat umum tidak boleh dilakukan dengan sewenang-wenangnya tanpa melibatkan penjelasan yang jelas dan teliti. Sekian, terima kasih.

PEMBERITAHUAN PERTANYAAN BAGI JAWAB LISAN
DEWAN RAKYAT MALAYSIA

PERTANYAAN : JAWAB LISAN

DARIPADA : TUAN WONG HON WAI [BUKIT BENDERA]

TARIKH : 28 JULAI 2020

SOALAN

TUAN WONG HON WAI [BUKIT BENDERA] minta **MENTERI LUAR NEGERI** menyatakan apakah usaha dan tuntutan Kerajaan dalam mempertahankan pendudukan Malaysia di Laut Cina Selatan dari segi pertahanan, diplomatik dan undang-undang laut antarabangsa.

JAWAPAN

Tuan Yang di-Pertua,

Saya mengucapkan terima kasih kepada Yang Berhormat Tasek Gelugor atas pertanyaan yang dikemukakan.

Tuan Yang di-Pertua,

2. Izinkan saya menjawab pertanyaan Yang Berhormat Tasek Gelugor bersekali dengan pertanyaan yang dikemukakan oleh Yang Berhormat Bukit Bendera bertarikh 28 Julai 2020, kerana pertanyaan-pertanyaan tersebut menyentuh akan perkara yang sama.

Tuan Yang di-Pertua,

3. Malaysia tetap tegas dalam komitmennya untuk mempertahankan kedaulatan dan hak kedaulatannya. Dalam hal ini, Malaysia **komited untuk menyelesaikan isu-isu Laut China Selatan secara konstruktif, menggunakan forum dan saluran diplomatik yang sesuai.**

4. Sepertimana Dewan yang mulia ini sedia maklum, isu berkaitan Laut China Selatan merupakan isu yang kompleks berikutan tuntutan-tuntutan bertindih. Oleh yang demikian, isu ini perlu dikendalikan secara menyeluruh dan setiap tindakan yang diambil oleh Kerajaan adalah berdasarkan pertimbangan yang komprehensif.

5. Untuk makluman Dewan yang mulia ini, melalui statistik daripada pihak Agensi Penguatkuasaan Maritim Malaysia (APMM), agensi tersebut telah menjalankan sejumlah 144,987 pemeriksaan ke atas pelbagai jenis vesel menerusi OP NAGA bermula tahun 2019 sehingga 30 Mei 2020. Daripada jumlah pemeriksaan yang dilaksanakan tersebut, sebanyak 1,127 bot nelayan asing telah ditahan oleh Agensi yang melibatkan pelanggaran pelbagai jenis akta-akta yang berkaitan. Pihak TLDM turut membantu pihak APMM secara *opportunity basis* dalam melaksanakan aktiviti penahanan nelayan asing. Sepanjang tahun 2019, sebanyak 20 bot nelayan asing telah ditahan oleh pihak TLDM menerusi operasi yang sama.

6. Selain itu, pihak APMM juga telah melaksanakan pengusiran terhadap 108 jenis vesel sepanjang tempoh Perintah Kawalan Pergerakan (PKP). Tindakan pengusiran ini dilakukan selaras dengan prinsip Kerajaan untuk mengekang penularan wabak COVID-19 dan memutuskan rantai wabak tersebut.

7. Sementara itu, sejak awal tahun 2019 sehingga 30 Jun 2020, pihak Tentera Laut Diraja Malaysia (TLDM) telah mengesan sebanyak 28 buah kapal perang dan 39 buah kapal penguatkuasa maritim asing yang didapati mencerooboh perairan Malaysia di Laut China Selatan. Kerajaan Malaysia secara konsisten telah mengemukakan Nota Bantahan kepada negara-negara yang mana kapal asing milik Kerajaan negara tersebut yang didapati mencerooboh perairan negara ini.

8. Tindakan ini diambil selaras dengan undang-undang antarabangsa dan pendirian Malaysia, iaitu semua pihak perlu mengelak tindakan yang boleh menimbulkan ketegangan atau boleh dengan izin, "*escalate*" sesuatu situasi di lautan. Kerajaan Malaysia selalu mengamalkan dan mengambil pendekatan dengan izin, "*measured*" yang berdasarkan dengan

izin, “*self-restraint*” untuk mengelak daripada menimbulkan ketidakstabilan di rantau ini yang boleh memberi kesan kepada kesejahteraan rakyat dan perkembangan ekonomi negara.

9. Secara keseluruhannya, semua agensi berkaitan dan agensi penguatkuasa maritim di negara ini, termasuklah TLDM dan APMM sentiasa komited dalam memastikan kedaulatan dan hak kedaulatan Malaysia adalah kekal terpelihara.

Tuan Yang di-Pertua,

10. Untuk makluman Dewan yang mulia ini, sebagai langkah untuk memastikan keamanan, kestabilan dan mengelakkan ketegangan di Laut China Selatan, negara-negara ASEAN dan China telah memeterai Deklarasi Tatalaku Pihak–pihak Berkepentingan di Laut China Selatan, atau dengan izin, *Declaration on the Conduct of Parties in the South China Sea* (DOC) pada 4 November 2002.

11. Pada masa yang sama, negara-negara ASEAN dan China sedang merundingkan **Kod Tatalaku di Laut China Selatan**, atau dengan izin, ***Code of Conduct in the South China Sea (COC)***. COC dilihat sebagai satu usaha untuk memastikan pihak-pihak di Laut China Selatan mengelakkan konflik antara satu sama lain.

Sekian, terima kasih.

PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA
PARLIMEN KEEMPAT BELAS

PERTANYAAN : LISAN

DARIPADA : DR. AZMAN BIN ISMAIL [KUALA KEDAH]

TARIKH : 28 JULAI 2020 (SELASA)

SOALAN

DR. AZMAN BIN ISMAIL [KUALA KEDAH] minta **MENTERI KESIHATAN** menyatakan protokol rawatan bagi pesakit COVID-19 yang di tahap serius dan tenat yang diikuti oleh Kementerian Kesihatan. Berapa peratus kejayaan bagi protokol itu dan berapa anggaran kos bagi seorang pesakit.

JAWAPAN

Tuan Yang di-Pertua,

1. Sejak kemunculan pandemik COVID-19, Kementerian Kesihatan Malaysia (KKM) telah **membangunkan protokol rawatan COVID-19 yang dikemaskini** berdasarkan **saranan badan antarabangsa** seperti Pertubuhan Kesihatan Sedunia (*World Health Organization* - WHO), kajian saintifik dan keberkesanan rawatan ke atas pesakit-pesakit di Malaysia dan di luar negara.
2. Sehingga kini **tiada ubat khusus bagi merawat COVID-19**. Protokol rawatan terkini berpandukan tahap klinikal COVID-19, status klinikal pesakit, keputusan ujian makmal dan radiologi serta pelan rawatan pesakit.
3. Pelan rawatan bagi pesakit COVID-19 di Malaysia adalah berdasarkan lima (5) tahap klinikal iaitu:

Tahap 1 : Tidak bergejala

Tahap 2 : Bergejala tanpa radang paru-paru

Tahap 3 : Bergejala dengan radang paru-paru

Tahap 4 : Bergejala dengan radang paru-paru dan memerlukan bantuan oksigen

Tahap 5 : Pesakit kritikal dengan penglibatan *multiorgan*

4. Pesakit COVID-19 tahap 4 dan 5 akan ditempatkan di dalam Unit Rawatan Rapi (ICU) di mana terdapat penglibatan pelbagai disiplin bagi penjagaan yang komprehensif. Protokol rawatan bagi pesakit intensif adalah seperti berikut:

4.1 Sokongan Alat Bantuan Pernafasan dan Tanpa Alat Bantuan Pernafasan (*Ventilatory* dan *Non-Ventilatory*)

Bagi pesakit yang serius dan tidak stabil, alat bantuan pernafasan atau sokongan oksigen akan diberikan.

4.2 Rawatan Antiviral, Antibiotik dan *Immuno-modulatory*

Pada ketika ini, rawatan pesakit menggunakan ubat adalah berdasarkan tahap klinikal dan keadaan pesakit. Di antara ubat yang digunakan adalah ubat Antiviral dan ubat *Immuno-modulatory* yang berfungsi untuk memperbaiki respons sistem pertahanan tubuh. Ubat Antibiotik diberi jika pesakit disyaki atau disahkan mendapat jangkitan bakteria.

4.3 Rawatan Profilaksis Ubat Pencair Darah bagi *Venous Thromboembolism*

Rawatan ini hanya diberikan kepada pesakit dalam kategori klinikal tahap 4 dan 5 bagi mengelakkan keadaan darah beku di dalam saluran darah (*Venous Thromboembolism*) yang boleh menyebabkan kematian.

4.4 **Sokongan Hemodinamik**

Rawatan cecair atau infusi intravena akan diberikan kepada pesakit bagi mengekalkan hemodinamik dan mengelak terjadinya keadaan renjatan akut yang mengancam nyawa (*shock*). Ubat-ubat inotrope juga diberikan kepada pesakit sekiranya perlu.

4.5 **Terapi Nutrisi**

Pemberian nutrisi melalui *Naso Gastric Tube feeding* kepada pesakit akan dimulakan dalam masa 24 – 48 jam setelah pesakit masuk Unit Rawatan Rapi (ICU).

5. Selain daripada rawatan yang telah dinyatakan, pemantauan kadar gula darah pesakit, **pemberian ubatan profilaksis** bagi mengelak *stress ulcer*, pergerakan awal pesakit turut diberikan.

Tuan Yang di-Pertua,

6. Protokol ini sentiasa dikemaskini berdasarkan perkembangan terkini dan bukti saintifik dari masa ke semasa. Kementerian Kesihatan sentiasa komited dalam memberikan rawatan yang terbaik kepada pesakit COVID-19.

7. Berdasarkan data COVID-19 di Malaysia, **pada 23 Julai 2020, kadar kes pulih dan discaj dari wad adalah sebanyak 97%, lebih tinggi berbanding kadar sembuh global iaitu 56.7%.** Manakala daripada 290 pesakit yang tenat dan menerima rawatan di unit rawatan rapi (ICU), seramai 189 orang (65.2%) telah sembuh dan discaj. *Outcome* pesakit dipengaruhi oleh faktor usia, penyakit sedia ada termasuk darah tinggi, kencing manis, penyakit jantung dan kegagalan fungsi buah pinggang. *Outcome* pesakit turut dipengaruhi oleh komplikasi COVID-19 seperti pembentukan darah beku di dalam paru paru yang dikenali sebagai *Pulmonary Embolism*, tindak balas sistem pertahanan tubuh yang keterlaluan (Cytokine Storm) serta kerosakan pada tisu paru-paru yang boleh menyebabkan jangkitan bakteria.

8. Jumlah kumulatif kes kematian COVID-19 sehingga 23 Julai 2020 di Malaysia adalah sebanyak 123 kes iaitu 1.4% daripada jumlah keseluruhan kes COVID-19 di Malaysia berbanding 4.1% kadar kematian peringkat global. Ini menunjukkan protokol rawatan COVID-19 di Malaysia adalah efektif.

9. Anggaran kos perawatan pesakit COVID-19 yang tenat (tahap 4 dan 5), dengan mengambil kos median sebanyak RM870 sehari serta purata tempoh kemasukan selama 21 hari menjadikan anggaran jumlah kos rawatan sebanyak RM18,270 bagi setiap pesakit (RM870 x 21 hari).

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : DR. KELVIN YII LEE WUEN
[BANDAR KUCHING]**

TARIKH : 28 JULAI 2020 (SELASA)

SOALAN

DR. KELVIN YII LEE WUEN [BANDAR KUCHING] minta **MENTERI KESIHATAN** menyatakan kesediaan dan pelan Kementerian untuk mengendali kenaikan kes dan juga kematian (*mortality*) disebabkan penyakit bukan COVID-19, terutamanya mereka yang terlepas rawatan atau “*check up*” disebabkan COVID-19. Berapakah jangkaan pertambahan kadar kematian disebabkan kes bukan COVID-19 dan apakah pelan Kementerian terhadap isu ini.

JAWAPAN

Tuan Yang di-Pertua,

1. Walaupun negara dilanda pandemik COVID-19, Kementerian Kesihatan Malaysia (KKM) masih menyediakan perkhidmatan pesakit bukan COVID-19 di 139 buah hospital di seluruh negara. Daripada pemantauan, didapati tiada peningkatan dalam kematian pesakit bukan COVID-19 sepanjang tempoh ini.

2. Kementerian Kesihatan juga telah menyediakan dan melaksanakan inisiatif-inisiatif norma bahru susulan Perintah Kawalan Pergerakan Bersyarat (PKPB) serta Perintah Kawalan Pergerakan Pemulihan (PKPP) seperti berikut:

- 2.1 **Pengurangan katil COVID-19** di Hospital COVID-19 **kepada katil bukan COVID-19** secara berperingkat untuk merawat penyakit bukan COVID-19, selaras dengan jumlah pengurangan kes positif COVID-19;
- 2.2 **Pemanjangan waktu operasi klinik pakar/ dewan bedah** selepas waktu pejabat termasuk pada hari Sabtu bagi hospital-hospital tertentu;
- 2.3 **Mengoptimalkan penggunaan hospital-hospital bukan pakar** untuk menjalankan prosedur atau pembedahan tertentu melalui konsep Hospital Kluster;
- 2.4 **Penyumberluaran perkhidmatan** tertentu kepada hospital swasta untuk mengurangkan waktu menunggu prosedur atau pembedahan; dan
- 2.5 **Perkhidmatan secara maya**, termasuk '*virtual clinic*' telah dimulakan dan akan diperluaskan di beberapa hospital serta klinik kesihatan.

Sekian, terima kasih.

PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA
PARLIMEN KEEMPAT BELAS

PERTANYAAN : LISAN

DARIPADA : TUAN KHOO POAY TIONG [KOTA MELAKA]

TARIKH : 28 JULAI 2020 (SELASA)

SOALAN

TUAN KHOO POAY TIONG [KOTA MELAKA] minta MENTERI KESIHATAN menyatakan:-

- (a) bilangan sarung tangan, *gown*, *face shield*, *goggles*, pelitup mulut (*face mask*) dan peralatan PPE lain yang dibeli Kementerian untuk menangani wabak COVID-19 (dinyatakan secara berasingan); dan
- (b) berapa jumlah yang telah dibelanjakan untuk setiap peralatan tersebut (dinyatakan secara berasingan).

JAWAPAN

Tuan Yang di-Pertua,

1. Kementerian Kesihatan Malaysia (KKM) telah diperuntukkan **bajet khas sebanyak RM1.005 bilion** yang **diterima secara berperingkat** daripada Kementerian Kewangan dalam usaha mengekang serta mengurangkan penularan wabak COVID-19. Kementerian Kesihatan telah membelanjakan sebanyak **RM650 juta** melibatkan perbelanjaan seperti berikut:

- 1.1 perolehan aset (perubatan dan bukan perubatan);
- 1.2 ubat-ubatan;
- 1.3 reagen, *test kit* dan konsumabel;
- 1.4 *Personal Protective Equipment* (PPE);

- 1.5 perkhidmatan doktor swasta;
- 1.6 perkhidmatan penyumberluaran (*outsourcing*) ujian pengesanan COVID-19 dengan makmal swasta;
- 1.7 pelantikan kakitangan kontrak; dan
- 1.8 bayaran elaun COVID-19.

Personal Protective Equipment (PPE)

2. Kementerian Kesihatan telah melaksanakan **perolehan sebanyak 186.5 juta unit PPE** untuk kegunaan petugas barisan hadapan Kementerian Kesihatan (*Frontliners*) **dengan nilai RM299.4 juta**. Kaedah perolehan yang digunakan adalah **secara perolehan darurat** dan **menggunakan kontrak sedia ada** Kementerian Kesihatan termasuklah konsesi *Approved Product Purchased List* (APPL) bagi memastikan **bekalan diperolehi segera** serta **menyimpan stockpile yang mencukupi untuk sekurang-kurangnya tempoh tiga (3) bulan**.

3. Sehingga 17 Julai 2020, daripada RM299.4 juta, Kementerian Kesihatan telah membelanjakan sebanyak RM252.7 juta dan akan sentiasa memastikan peruntukan yang mencukupi dalam memastikan wabak COVID-19 dapat diuruskan dengan baik dan terkawal.

4. Selain itu juga, Kementerian Kesihatan **turut menerima sumbangan PPE** daripada pelbagai Negara, Agensi-Agensi Kerajaan, Pertubuhan Bukan Kerajaan (NGO) dan individu yang **berjumlah 14.8 juta unit**.

Sekian, terima kasih.

**PEMBERITAHUAN PERTANYAAN DEWAN RAKYAT,
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : TUAN WONG HON WAI
(BUKIT BENDERA)**

TARIKH : 28 JULAI 2020 (SELASA)

SOALAN

Minta **MENTERI PERTAHANAN** menyatakan kapasiti dan keupayaan Pangkalan Tentera Udara Malaysia di Butterworth, Pulau Pinang pada masa kini dan adakah pihak Kementerian akan meluaskan kapasiti dan keupayaan pangkalan tersebut untuk melindungi ruang udara Malaysia.

JAWAPAN

Tuan Yang di-Pertua,

Pangkalan Udara Butterworth adalah merupakan salah satu pangkalan udara utama Tentera Udara Diraja Malaysia (TUDM) yang menempatkan dua skuadron pesawat pejuang iaitu pesawat FA-18D Hornet dan pesawat Hawk 108/208, Skuadron Pertahanan Udara dan unit-unit bantuan.

Pangkalan Udara Butterworth turut dijadikan ibu pejabat Sistem Pertahanan Udara Bersepadu (*Integrated Air Defence Systems*) atau HQIADS di bawah Peraturan Pertahanan Lima Negara (*Five Power Defence Arrangements*) melibatkan Malaysia, Australia, Singapura, New Zealand dan United Kingdom.

Sehingga kini, Pangkalan Udara Butterworth mempunyai kapasiti serta keupayaan beroperasi secara aktif dalam memantau dan mempertahankan ruang udara negara daripada sebarang ancaman dan pencerobohan terutamanya dari sektor utara dan barat Semenanjung Malaysia. Pangkalan ini juga aktif di dalam pelaksanaan latihan dan operasi serta ekseseis yang melibatkan negara-negara luar.

Pelan Pembangunan Keupayaan Jangka Panjang TUDM yang dikenali sebagai *Capability Development 55* (CAP 55) telah menggariskan perancangan pembangunan keupayaan yang bakal merubah sedikit sebanyak struktur ketumbukan (*Force Structure*) di Pangkalan Udara Butterworth. Perancangan ini bakal menyaksikan peningkatan kapasiti dan keupayaan Pangkalan Udara Butterworth di masa hadapan melalui pertambahan aset udara.

Terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : YB DATIN PADUKA DR. TAN YEE KEW
[WANGSA MAJU]**

TARIKH : 28 JULAI 2020 (SELASA)

SOALAN

YB DATIN PADUKA DR. TAN YEE KEW minta **PERDANA MENTERI** menyatakan jumlah laporan rasuah yang diterima terhadap ahli politik dan pegawai Kerajaan di antara tahun 2018 hingga kini, berapa jumlah siasatan yang telah dibuka dan jumlah yang telah disabitkan di Mahkamah.

**JAWAPAN : (YB DATO' TAKIYUDDIN BIN HASSAN, MENTERI DI
JABATAN PERDANA MENTERI)**

Tuan Yang di-Pertua,

Untuk makluman Ahli Yang Berhormat Wangsa Maju, jumlah maklumat berkaitan rasuah yang diterima oleh Suruhanjaya Pencegahan Rasuah Malaysia (SPRM) terhadap ahli politik dan pegawai Kerajaan bagi tahun 2018 hingga Jun 2020 adalah sebanyak 6,237. Sebanyak 1,296 Kertas Siasatan telah dibuka atas maklumat tersebut. Manakala jumlah sabitan sepanjang tempoh tersebut adalah sebanyak 218.

Dimaklumkan juga, tidak semua maklumat yang diterima oleh SPRM berunsur rasuah dan memenuhi kriteria yang ditetapkan di bawah bidang kuasa SPRM. Kertas Siasatan dibuka berdasarkan kepada maklumat berkualiti yang mempunyai unsur-unsur rasuah, salah guna kuasa dan penyelewengan. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA 2020, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : YB TUAN TONY PUA KIAM WEE
[DAMANSARA]**

TARIKH : 28 JULAI 2020 (SELASA)

SOALAN

minta **PERDANA MENTERI** menyatakan syarat-syarat utama pembelian saham PT Eagle High oleh FELDA yang bernilai US\$505 juta. Apakah kedudukan tindakan FELDA untuk menuntut kembali pelaburan US\$505 juta ke atas PT Eagle High melalui '*put option*' yang dimaktubkan dalam perjanjian.

**JAWAPAN: [YB DATO' SRI MUSTAPA BIN MOHAMED, MENTERI DI
JABATAN PERDANA MENTERI (EKONOMI)]**

Tuan Yang di-Pertua,

1. Untuk makluman Ahli Yang Berhormat, isu berkaitan PT Eagle High dan FELDA telah dibawa ke Arbitration Proceedings di Singapore International Arbitration Centre.
2. Dalam hal ini, sebagai menghormati prosiding kes berkenaan, maka jawapan terhadap perkara yang dibangkitkan oleh Yang Berhormat tidak dapat diberikan buat masa ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI PANGLIMA MADIUS TANGAU
[TUARAN]**

TARIKH : 28 JULAI 2020 (SELASA)

SOALAN

DATUK SERI PANGLIMA MADIUS TANGAU [TUARAN] minta **PERDANA MENTERI** menyatakan apakah langkah-langkah Kerajaan untuk memastikan agar kesemua 17 perkara daripada 21 perkara yang telah dipersetujui oleh Jawatankuasa Kajian Semula Pelaksanaan Perjanjian Malaysia 1963 atau MA63 dapat dilaksanakan sepenuhnya dan supaya kesemua perakuan MA63 ditunaikan.

**JAWAPAN: YB DATO HAJJAH HANIFAH HAJAR TAIB, TIMBALAN
MENTERI DI JABATAN PERDANA MENTERI (HAL
EHWAL SABAH DAN SARAWAK)**

Assalamualaikum wa rahmatullahi wa barakatuh dan Salam Sejahtera....

Tuan Yang di-Pertua,

Untuk makluman Ahli Yang Berhormat,

1. Kerajaan kini dalam proses akhir dan sedang memuktamadkan cadangan struktur dan komposisi Majlis Khas untuk menyemak pelaksanaan Perjanjian Malaysia 1963 (MA63). Keputusan untuk penubuhan Majlis Khas ini adalah selaras dengan syor dan keputusan Jawatankuasa Khas Kabinet Untuk Menyemak Pelaksanaan Perjanjian Malaysia 1963 (JKKK MA63) yang telah dibubarkan pada 18 November 2019 terdahulu. Dijangka perkara berkenaan penubuhan Majlis Khas ini serta hala tuju baharu semakan pelaksanaan MA63 akan dibawa ke Jemaah Menteri dalam tempoh terdekat.

Untuk makluman Ahli Yang Berhormat,

2. Berhubung dengan status semasa pelaksanaan 17 daripada 21 perkara yang telah dibentang dalam JKKK MA63, secara umumnya, agensi-agensi yang bertanggungjawab dijangka memerlukan tempoh sekitar 1-2 tahun untuk melaksanakan keputusan-keputusan tersebut. Manakala baki 4 perkara yang belum selesai seperti **Royalti Minyak dan Bayaran Tunai Petroleum, Mineral Minyak dan Medan Minyak, Akta Laut Wilayah 2012 [Akta 750] dan Akta Pelantar Benua 1966 [Akta 83]** akan diteruskan perbincangan selanjutnya dalam Majlis Khas yang bakal ditubuhkan kelak.

3. Kerajaan yakin bahawa kejayaan dalam agenda ini akan meredakan ketidak-puasan hati rakyat di negeri Sabah dan Sarawak yang selama ini merenggangkan perpaduan dan integriti wilayah yang kukuh serta sekaligus akan dapat memperkasakan patriotisma dan nasionalisma negara bangsa.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA 2020, PENGGAL KETIGA
PARLIMEN KEEMPAT BELAS**

PERTANYAAN : LISAN

DARIPADA : YB TUAN LIM GUAN ENG [BAGAN]

TARIKH : 28 JULAI 2020 (SELASA)

SOALAN

Minta **PERDANA MENTERI** menyatakan jumlah yang dibayar oleh Petronas kepada setiap negeri sama ada secara langsung atau tidak langsung menerusi Kerajaan Persekutuan sejak 2008 dan berikan pecahan mengikut tahun. Adakah peletakan jawatan Presiden/CEO Petronas ada kaitan dengan bayaran ini.

**JAWAPAN: YB DATO' SRI MUSTAPA BIN MOHAMED, MENTERI DI
JABATAN PERDANA MENTERI (EKONOMI)**

Tuan Yang di-Pertua,

1. Sebagaimana Ahli Yang Berhormat sedia maklum, jumlah bayaran tunai hasil petroleum yang dibayar kepada negeri Sabah, Sarawak, Terengganu dan Kelantan dari tahun 2008 hingga 2019 berjumlah hampir RM59.8 bilion.
2. Petroliaam Nasional Berhad (PETRONAS) membuat bayaran tunai hasil petroleum sebanyak 5% secara terus kepada Kerajaan Negeri Sabah dan Sarawak masing-masing. Bagi Kerajaan Negeri Kelantan dan Terengganu pula, PETRONAS menyalurkan bayaran kepada Kementerian Kewangan Malaysia (MOF) yang seterusnya membuat bayaran kepada kedua-dua negeri tersebut.

NO SOALAN : 28

3. Pecahan bayaran oleh PETRONAS sejak 2008 hingga 2019 bagi Negeri Sarawak, Sabah, Terengganu dan Kelantan adalah seperti jadual di bawah:

Tahun	Sarawak	Sabah	Terengganu	Kelantan
2008	2,273,908,197.00	953,063,443.00	2,994,850,160.00	0.00
2009	1,534,335,792.00	695,430,281.00	1,858,671,488.00	25,592,321.00
2010	1,794,257,089.00	813,117,173.00	1,899,176,478.00	16,561,833.00
2011	2,462,149,232.00	879,443,359.00	2,176,793,969.00	22,651,194.00
2012	2,516,185,701.00	978,059,751.00	2,472,573,539.00	77,747,430.00
2013	2,647,783,705.00	982,779,820.00	2,281,473,533.00	54,035,879.00
2014	2,627,878,272.00	964,256,921.00	2,063,262,839.00	47,555,858.00
2015	1,851,661,931.00	862,619,974.00	1,209,619,459.00	40,657,263.00
2016	1,354,544,054.00	980,320,869.12	1,086,397,903.00	30,975,023.00
2017	1,664,918,116.00	1,466,391,607.00	1,245,948,045.00	24,672,483.00
2018	1,943,099,794.00	1,725,319,233.28	1,463,717,104.96	30,470,926.00
2019	1,871,225,760.00	1,483,123,351.23	1,291,815,791.92	32,325,624.00
Jumlah	24,541,947,643.00	12,783,925,782.64	22,044,300,309.88	403,245,834.00

* Jumlah bayaran tunai keseluruhan : **RM59,773,419,569.52**

Jadual 1: Pecahan bayaran tunai petroleum ke Sarawak, Sabah, Terengganu dan Kelantan (2008-2019)

4. Suka saya maklumkan bahawa PETRONAS juga telah membayar dividen kepada Kerajaan Persekutuan berjumlah RM282 bilion dari tahun 2010 hingga 2019. Pecahan maklumat bayaran dividen dan tunai petroleum oleh PETRONAS kepada Kerajaan Persekutuan pada tahun 2010 hingga 2019 adalah seperti berikut:

Tahun	Dividen (RM bil)	Bayaran tunai petroleum (RM bil)	Harga minyak mentah (AS\$ setong)	Keuntungan lepas cukai PETRONAS (Profit after tax)
2010	30.0	4.9	79.6	
2011	30.0	5.1	111.3	
2012	28.0	6.4	111.6	59.5*
2013	27.0	6.2	108.6	65.6*
2014	29.0	6.5	99.0	47.6*
2015	26.0	5.1	52.3	20.8
2016	16.0	3.7	43.6	23.8
2017	16.0	4.4	54.1	45.5
2018	26.0	5.2	71.3	55.3
2019	54.0**	5.7	64.2	40.5
Jumlah	282.0	53.3		

(*) PETRONAS Annual report 2014

(**) Termasuk dividen khas RM30 bil

Jadual 2: Pecahan bayaran dividen, bayaran tunai petroleum ke Kerajaan Persekutuan (2010-2019)

5. Untuk makluman Ahli Berhormat, bekas Presiden dan Ketua Pegawai Eksekutif Kumpulan PETRONAS Tan Sri Wan Zulkiflee telah mengambil keputusan untuk bersara setelah 37 tahun berkhidmat bersama PETRONAS. Pelantikan beliau sebagai Pengerusi MAS merupakan pengiktirafan Kerajaan di atas pengalaman beliau yang luas dan mendalam serta kejayaan beliau mengemudi PETRONAS di dalam suasana yang sangat mencabar. Tindakan ini juga merupakan salah satu usaha Kerajaan bagi mengkaji semula pucuk kepimpinan syarikat-syarikat milik Kerajaan.

6. Mengikut Akta Kemajuan Petroleum 1974 yang digubal Parlimen Malaysia pada Ogos 1974, seksyen 2(1) menyatakan seluruh pemunyaan mengenai petroleum, dan hak, kuasa, kebebasan dan keistimewaan eksklusif untuk mengeksplorasi, mengeksploit, mendapatkan dan memperoleh petroleum sama ada di pantai atau di luar pantai Malaysia hendaklah diletakhakkan pada Perbadanan (iaitu PETRONAS) yang diperbadankan di bawah Akta Syarikat 1965 atau di bawah undang-undang yang berhubungan. Manakala, seksyen 3(2) menyatakan bahawa Perbadanan itu (iaitu PETRONAS) hendaklah tertakluk kepada kawalan dan arahan Perdana Menteri dan Perdana Menteri boleh dari semasa ke semasa mengeluarkan apa-apa arahan sebagaimana yang difikirkannya patut.

7. Pentadbiran serta tadbir urus PETRONAS dikemudi oleh barisan kepimpinan eksekutif kanan yang diketuai oleh Presiden dan Ketua Pegawai Eksekutif Kumpulan. Di samping itu, ahli lembaga pengarah PETRONAS yang diketuai oleh Pengerusi PETRONAS, dilantik dari kalangan pegawai kanan kerajaan serta tokoh korporat yang mempunyai latar belakang dan pengalaman yang luas. Komitmen serta peranan ahli lembaga pengarah adalah untuk memimpin, mengawasi dan memastikan urustadbir PETRONAS sentiasa telus dan berada pada tahap integriti yang tertinggi. Di samping itu, ahli lembaga pengarah PETRONAS juga berfungsi dalam memastikan setiap keputusan diambil di peringkat tertinggi adalah selari dengan arah tuju dan keperluan korporat, serta pengendalian perniagaan dan operasi PETRONAS adalah mapan dan mematuhi perundangan sedia ada.

8. Suka saya maklumkan bahawa peletakan jawatan Presiden dan Ketua Pegawai Eksekutif (CEO) PETRONAS baru-baru ini tiada kaitan kerana bayaran-bayaran berkenaan.

Sekian, terima kasih.

**PEMBERITAHUAN PERTANYAAN LISAN DERWAN RAKYAT
MESYUARAT KEDUA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : YB TUAN KARUPAIYA A/L MUTUSAMI
[PADANG SERAI]**

TARIKH : 28 JULAI 2020 (SELASA)

SOALAN

YB TUAN KARUPAIYA A/L MUTUSAMI [PADANG SERAI] minta **PERDANA MENTERI** menyatakan isu 'lompat parti' di mana amarah rakyat telah tercetus sehingga Yang Berhormat digelar 'katak'. Sebagai sebuah negara yang mengamalkan demokrasi berparlimen yang berlandaskan perlembagaan dan kedaulatan undang-undang, rakyat yang mengundi berhak sepenuhnya dalam membentuk dan memilih Kerajaan. Apakah tindakan Kerajaan kini dalam menghindari isu ini.

**JAWAPAN: (YB DATO' TAKIYUDDIN BIN HASSAN, MENTERI DI
JABATAN PERDANA MENTERI**

Tuan Yang di-Pertua,

Pada masa ini, Kerajaan berpandangan bahawa setiap warganegara masih dijamin hak untuk bebas berpersatuan yang selaras dengan Perkara 10(1)(C) Perlembagaan Persekutuan. Hak untuk bebas berpersatuan ini turut telah dibincangkan dalam keputusan Mahkamah Persekutuan dalam kes Dewan Undangan Negeri Kelantan & Anor v Nordin bin Salleh & Anor [1992] 1 CLJ 343.

Namun, sekiranya Kerajaan berpandangan terdapat keperluan untuk menggubal undang-undang lompat parti ini pada masa akan datang, sudah pasti kajian terperinci akan dilakukan termasuklah dengan mengadakan perbandingan *best practices* dengan negara-negara lain.

Kajian secara terperinci ini perlu dilakukan memandangkan perkara ini bercanggah dengan Perkara 10(1)(C) Perlembagaan Persekutuan iaitu hak membentuk persatuan dengan syarat ia tidak membabitkan soal keselamatan, ketenteraman awam atau prinsip moral. Pihak Kerajaan juga perlu mengadakan konsultasi dengan pelbagai pihak lain termasuklah badan bukan Kerajaan dan parti politik jika ianya hendak digubal kelak.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA
PARLIMEN KEEMPAT BELAS**

PERTANYAAN : LISAN

DARIPADA : YB TUAN CHAN FOONG HIN [KOTA KINABALU]

TARIKH : 28 JULAI 2020

SOALAN

YB Tuan Chan Foong Hin [Kota Kinabalu] minta PERDANA MENTERI menyatakan bagi Kabinet yang diumumkan pada 9 Mac 2020, terdapat 70 orang keseluruhannya yang merangkumi seorang Perdana Menteri, 31 Menteri dan 38 Timbalan Menteri, Apakah penambahan kos emolumen, elaun dan lain-lain untuk kabinet PN berbanding dengan kabinet PH sebelum ini.

JAWAPAN: [YB DATO' TAKIYUDDIN BIN HASAN, MENTERI DI JABATAN PERDANA MENTERI]

Tuan Yang di-Pertua,

Untuk makluman Ahli Yang Berhormat, Anggota Pentadbiran Kerajaan di bawah Perikatan Nasional menerima jumlah saraan yang sama seperti mana yang dinikmati oleh Anggota Pentadbiran di bawah pentadbiran Pakatan Harapan serta Barisan Nasional. Ini kerana apa-apa yang dibayar atau diberikan adalah seperti mana yang termaktub di bawah Akta Ahli Parlimen (Saraan) 1980 atau Akta 237.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA
PARLIMEN KEEMPAT BELAS**

PERTANYAAN : LISAN

DARIPADA : YB PUAN NOORITA BINTI SUAL [TENOM]

TARIKH : 28 JULAI 2020 (SELASA)

SOALAN

YB PUAN NOORITA BINTI SUAL [TENOM] minta **PERDANA MENTERI** menyatakan adakah Kerajaan bercadang untuk menggubal undang-undang Anti Lompat Parti bagi mengekang perbuatan lompat parti oleh ahli-ahli yang berhormat yang telah dipilih rakyat dalam pilihan raya.

JAWAPAN: (YB DATO' TAKIYUDDIN BIN HASSAN, MENTERI DI JABATAN PERDANA MENTERI)

Tuan Yang di-Pertua,

Pada masa ini, Kerajaan berpandangan bahawa setiap warganegara masih dijamin hak untuk bebas berpersatuan yang selaras dengan Perkara 10 (1) (C) Perlembagaan Persekutuan. Hak untuk bebas berpersatuan ini turut telah dibincangkan dalam keputusan Mahkamah Persekutuan dalam kes Dewan Undangan Negeri Kelantan & Anor v Nordin bin Salleh & Anor [1992] 1 CLJ 343.

Namun, sekiranya Kerajaan berpandangan terdapat keperluan untuk menggubal undang-undang lompat parti ini pada masa akan datang, sudah pasti kajian terperinci akan dilakukan termasuklah dengan mengadakan perbandingan *best practices* dengan negara-negara lain.

NO. SOALAN : 31

Kajian secara terperinci ini perlu dilakukan memandangkan perkara ini bercanggah dengan Perkara 10(1)(C) Perlembagaan Persekutuan iaitu hak membentuk persatuan dengan syarat ia tidak membabitkan soal keselamatan, ketenteraman awam atau prinsip moral. Pihak Kerajaan juga perlu mengadakan konsultasi dengan pelbagai pihak lain termasuklah badan bukan Kerajaan dan parti politik jika ianya hendak digubal kelak.

Sekian, terima kasih.

**PEMBERITAHUAN PERTANYAAN DEWAN RAKYAT,
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : TUAN NIK NAZMI BIN NIK AHMAD
(SETIAWANGSA)**

TARIKH : 28 JULAI 2020 (SELASA)

SOALAN

Minta **MENTERI PERTAHANAN** menyatakan apakah tindakan lanjut yang diambil berkenaan kesalahan yang telah dilakukan oleh anggota pentadbiran berkenaan Ops Yaman 2 yang tidak dibincangkan di Kabinet mahupun di Parlimen.

JAWAPAN

Tuan Yang di-Pertua,

Satu laporan bagi perkara ini telah dibentangkan kepada Jawatankuasa Pilihan Khas Parlimen untuk Pertahanan dan Hal Ehwal Dalam Negeri Bilangan 2/2020 pada 5 Februari 2020.

Terima kasih.

PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA
PARLIMEN KEEMPAT BELAS

PERTANYAAN : LISAN

DARIPADA : DATUK HAJI HASANUDDIN BIN MOHD
YUNUS [HULU LANGAT]

TARIKH : 28 JULAI 2020 (SELASA)

SOALAN

DATUK HAJI HASANUDDIN BIN MOHD YUNUS [HULU LANGAT] minta **MENTERI KESIHATAN** menyatakan ada perancangan mewujudkan unit udaranya sendiri/ ambulans udara seperti mana negara maju lain memandangkan bebanan penggunaan helikopter oleh lain-lain agensi telah mencapai tahap maksimum terutamanya di kawasan pedalaman.

JAWAPAN

Tuan Yang di-Pertua,

1. Kementerian Kesihatan Malaysia (KKM) amat prihatin dalam memastikan rakyat mendapat perkhidmatan kesihatan dan perubatan dengan konsep **No One Is Left Behind**. Akses untuk mendapatkan perkhidmatan kesihatan disediakan secara komprehensif oleh Kementerian Kesihatan termasuk perkhidmatan ambulan udara.

2. Skop perkhidmatan ambulan udara yang disediakan adalah merangkumi:

- 2.1 **Pasukan Doktor Udara** (*Flying Doctor Services – FDS*) adalah merupakan perkhidmatan Klinik Bergerak di mana pasukan kesihatan yang terlibat terdiri daripada Pegawai Perubatan, Jururawat, Penolong Pegawai Perubatan,

Pegawai Zat Makanan dan Pembantu Kesihatan Awam. Perkhidmatan yang disediakan merangkumi rawatan pesakit luar, perkhidmatan kesihatan ibu dan kanak-kanak seperti penjagaan antenatal, postnatal, imunisasi, rawatan susulan bagi penyakit kronik, prosedur rawatan ringan, perkhidmatan sokongan asas makmal (*point of care testing*) dan perkhidmatan farmasi. Selain itu, saringan kesihatan dan aktiviti promosi kesihatan, perkhidmatan pergigian serta pemberian bakul makanan bagi kanak-kanak kurang zat makanan juga diberikan.

- 2.2 Perkhidmatan **MEDEVAC** (*Medical Evacuation*) di mana helikopter digunakan bagi penghantaran pesakit kritikal dari satu fasiliti kesihatan ke fasiliti kesihatan yang lain bagi tujuan rujukan dan rawatan susulan samada dari Klinik Kesihatan ke Hospital atau dari Hospital ke Hospital yang lain.

3. Perkhidmatan ambulan udara disediakan di negeri Sabah, Sarawak dan kawasan pedalaman di Negeri Perak dan Kelantan (untuk masyarakat Orang Asli) memandangkan keadaan geografi serta akses kepada fasiliti kesihatan adalah terhad di sesetengah kawasan di negeri-negeri tersebut.

4. **Perkhidmatan Flying Doctor Service** dan **MEDEVAC** ini **disediakan secara penyumberluaran** (*outsource*) kepada pihak swasta kerana ianya adalah **lebih cost effective** berbanding kos bagi mewujudkan unit udara di Kementerian Kesihatan yang melibatkan pembelian helikopter/ pesawat serta kos penyelenggaraan dan pengoperasian yang amat tinggi.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : YB PUAN HAJAH FUZIAH BINTI SALLEH
[KUANTAN]**

TARIKH : 28 JULAI 2020

SOALAN

YB PUAN HAJAH FUZIAH BINTI SALLEH [KUANTAN] minta **PERDANA MENTERI** menyatakan sejauh mana Kerajaan bersetuju untuk menggantikan sistem Pemenang Undi Terbanyak (First-Past-The-Post) FPTP dengan sistem Perwakilan Berkadar (PR) yang dicadangkan oleh Jawatankuasa Khas Pembaikan Sistem dan Undang-Undang Pilihan Raya (ERC) atau sistem Perwakilan Bercampuran yang dicadangkan oleh Bersih 2.0.

**JAWAPAN : (YB DATO' TAKIYUDDIN BIN HASSAN, MENTERI DI
JABATAN PERDANA MENTERI)**

Untuk makluman Ahli Yang Berhormat, Kerajaan sentiasa terbuka untuk meneliti cadangan-cadangan penambahbaikan daripada pelbagai pihak termasuklah cadangan untuk menukar sistem pilihan raya daripada *First Past The Post* kepada sistem Perwakilan Berkadar atau sistem Perwakilan Bercampuran.

Suruhanjaya Pilihan Raya (SPR) dan Jawatankuasa Pembaikan Sistem dan Undang-Undang Pilihan Raya Malaysia (*Electoral Reform Committee* - ERC), Jabatan Perdana Menteri sedang meneliti sistem pilihan raya sedia ada dan mengkaji kesesuaian sistem-sistem pilihan raya yang lain termasuklah cadangan sistem Perwakilan Berkadar dan sistem Perwakilan Bercampuran. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : YB TUAN CHANG LIH KANG
[TANJONG MALIM]**

TARIKH : 28 JULAI 2020

SOALAN

YB TUAN CHANG LIH KANG [TANJONG MALIM] minta **PERDANA MENTERI** menyatakan apakah rasional untuk mewujudkan Menteri Tugas-tugas Khas di bawah Jabatan Perdana Menteri. Apakah tanggungjawab yang pernah ditugaskan kepada Kementerian ini.

JAWAPAN : YB DATUK SERI MOHD REDZUAN YUSOF
MENTERI DI JABATAN PERDANA MENTERI
(TUGAS-TUGAS KHAS)

Tuan Yang Dipertua,

1. Selaku Menteri Tugas-Tugas Khas di Jabatan Perdana Menteri, terdapat 5 agensi yang telah diletakkan di bawah portfolio saya iaitu Angkatan Pertahanan Awam (APM), Agensi Pengurusan Bencana Negara (NADMA), Unit Penyampaian Kemakmuran Bersama atau disebut sebagai *Shared Prosperity Delivery Unit* (SEPADU), Unit Peneraju Agenda Bumiputera (TERAJU) dan Yayasan Peneraju Pendidikan Bumiputera.

2. Selaras dengan fungsi NADMA sebagai agensi yang mengkoordinasi pengurusan bencana negara ini, saya diamanahkan sebagai Pengerusi Jawatankuasa Pengurusan Bencana Pusat (JPBP) dan juga bertanggungjawab ke atas perbelanjaan peruntukan

pengurusan bencana di bawah Kumpulan Wang Amanah Bantuan Bencana Negara (KWABBN). NADMA dan APM telah memainkan peranan yang besar dalam membantu Kerajaan menangani penularan wabak COVID19.

3. Di antara pencapaian utama dalam pengurusan bencana negara adalah seperti yang berikut:

- i. Mengkoordinasi pengurusan 322 buah Pusat Pemindahan yang boleh menempatkan 104,467 orang *Persons Under Surveillance* (PUS);
- ii. Mengkoordinasi pengurusan penerimaan sumbangan dan perbelanjaan Tabung COVID-19;
- iii. Mengkoordinasi penerimaan dan agihan sumbangan item bukan berbentuk kewangan seperti pelitup muka, *hand sanitizer*, termometer digital, sarung tangan, *Personal Protection Equipment* (PPE) dan kit ujian COVID1;
- iv. Mengkoordinasi agihan perolehan dan sumbangan 52.68juta pelitup muka, 19,882 botol *hand sanitizer*, 9,413 termometer digital, 1.54 juta sarung tangan, dan lain-lain item kepada agensi-agensi barisan hadapan (*frontliners*) dan rakyat mengikut data ketua isi rumah; dan
- v. Mengkoordinasi pengurusan COVID-19 seperti misi *Humanitarian Assistance and Disaster Relief* (HADR), pengurusan Stesen-stesen Kuarantin, penyaluran kewangan kepada negeri-negeri dan Jabatan Kebajikan Masyarakat untuk pengurusan COVID-19, bantuan makanan pelajar berikutan Perintah Kawalan Pergerakan di bawah Kementerian Pengajian Tinggi dan Kementerian Pendidikan Malaysia, dan juga pengurusan hospital sementara MAEPS.

4. Untuk makluman Ahli Yang Berhormat, agensi SEPADU pula berfungsi untuk menetapkan halatuju dan merangka pelan tindakan serta memantau pelaksanaan inisiatif-inisiatif Wawasan Kemakmuran Bersama 2030 dalam memastikan sasaran yang ditetapkan dapat dicapai menjelang 2030. SEPADU juga berperanan sebagai pemudahcara dalam usaha mempergiat pembangunan ekonomi Bumiputera dan Negara oleh pemain-pemain industri dalam mencapai kemakmuran bersama dengan keutamaan kepada masyarakat B40.

5. Sebuah lagi agensi iaitu TERAJU, merupakan unit strategik yang berperanan untuk meneraju, memacu dan menyelaraskan penyertaan Bumiputera dalam ekonomi negara. Pada 14 Julai 2020 yang lalu, Mesyuarat Majlis Tindakan Ekonomi (EAC) telah bersetuju untuk mewujudkan Majlis Kemakmuran Bumiputera (MKB) yang akan dipengerusikan oleh YAB Perdana Menteri dan TERAJU sebagai agensi penyelarasan tunggal bagi MKB ini diberi tanggungjawab untuk melaksanakan segala keputusan yang dibuat oleh kerajaan di dalam Majlis ini untuk memenuhi keperluan Bumiputera termasuk usaha pemulihan ekonomi pasca COVID-19.

6. Yayasan Peneraju pula berperanan untuk meningkatkan kualiti, kuantiti dan keberkesanan bakat-bakat Bumiputera sejajar dengan usaha menaiktaraf Malaysia ke arah negara berpendapatan tinggi melalui pendidikan akademik, pensijilan profesional dan vokasional.

7. Selain daripada fungsi dan peranan yang telah saya sebutkan tadi, portfolio Menteri Tugas-Tugas Khas juga termasuklah melaksanakan apa-apa tugas khas yang diberikan oleh YAB Perdana Menteri dari semasa ke semasa.

Sekian, terima kasih.

PEMBERITAHUAN PERTANYAAN BAGI JAWAB LISAN
DEWAN RAKYAT MALAYSIA

PERTANYAAN : JAWAB LISAN

DARIPADA : TUAN STEVEN CHOONG SHIAU YOON
[TEBRAU]

TARIKH : 28 JULAI 2020

SOALAN

TUAN STEVEN CHOONG SHIAU YOON [TEBRAU] minta **MENTERI LUAR NEGERI** menyatakan pendirian Kerajaan baru tentang Statut Rom dan Konvensyen Antarabangsa Mengenai Penghapusan Segala Bentuk Diskriminasi Kaum (ICERD).

JAWAPAN

Tuan Yang di-Pertua,

Saya mengucapkan terima kasih kepada Yang Berhormat Tebrau di atas pertanyaan yang dikemukakan.

2. Sebagaimana Dewan yang mulia ini sedia maklum, usaha supaya Malaysia menyertai Statut Rome dan Konvensyen Antarabangsa mengenai Penghapusan Segala Bentuk Diskriminasi Kaum [*International Convention on the Elimination of All Forms of Racial Discrimination* (ICERD)] adalah merupakan inisiatif Kerajaan Pakatan Harapan yang terdahulu.

3. Dalam hal ini, Kerajaan tidak akan terburu-buru dalam meratifikasikan konvensyen-konvensyen ini, malah akan memastikan perbincangan berterusan secara berkala diadakan dengan semua pemegang taruh, termasuk masyarakat madani.

4. Langkah ini penting bagi memastikan peruntukan-peruntukan sedia ada dalam konvensyen antarabangsa tersebut adalah serasi dan tidak bercanggah dengan undang-undang domestik sedia ada.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : YB TUAN R. SIVARASA [SUNGAI BULOH]

TARIKH : 28 JULAI 2020

SOALAN

TUAN R. SIVARASA [SUNGAI BULOH] minta **PERDANA MENTERI** menyatakan perkembangan pendaftaran pengundi secara automatik dan penguatkuasaan usia kelayakan mengundi 18 tahun. Apakah kekangan yang dihadapi oleh Kerajaan bagi mempercepatkan pelaksanaan kedua-dua perkara itu.

JAWAPAN : (YB DATO' TAKIYUDDIN BIN HASSAN, MENTERI DI JABATAN PERDANA MENTERI)

Tuan Yang di- Pertua,

Untuk makluman Ahli Yang Berhormat, Suruhanjaya Pilihan Raya (SPR) sedang dalam persiapan untuk melaksanakan umur kelayakan pengundi 18 tahun dan pendaftaran pemilih secara automatik berdasarkan kepada pindaan Perkara 119(4) Perlembagaan Persekutuan yang telah diluluskan oleh Parlimen pada Mesyuarat Kedua Penggal Kedua Parlimen Keempat Belas (2019) yang lalu.

Persiapan yang sedang dilaksanakan oleh SPR adalah meliputi penyediaan **pindaan kepada Peraturan-Peraturan Pilihan Raya (Pendaftaran Pemilih) 2002 dan undang-undang lain yang berkaitan, penyediaan *standard operating procedures* (SOP) dan penyediaan sistem dan infrastruktur** bagi pelaksanaan umur kelayakan pengundi 18 tahun dan pendaftaran pemilih secara automatik.

Sehubungan itu, SPR telah mengadakan **beberapa sesi libat urus** bersama beberapa jabatan/agensi Kerajaan seperti berikut:

- (i) Unit Pemodenan Tadbiran dan Perancangan Pengurusan Malaysia (MAMPU), Jabatan Perdana Menteri;
- (ii) Kementerian Dalam Negeri;
- (iii) Jabatan Pendaftaran Negara (JPN);
- (iv) Jabatan Penjara Malaysia;
- (v) Pejabat Ketua Pendaftar Mahkamah;
- (vi) Kementerian Kesihatan Malaysia;
- (vii) Angkatan Tentera Malaysia; dan
- (viii) Polis DiRaja Malaysia.

Selain itu, SPR juga telah mengadakan beberapa sesi libat urus dengan pihak berkepentingan seperti berikut:

- (i) Sesi Libat Urus Bersama Parti-Parti Politik Dari Blok Kerajaan Dan Blok Pembangkang (Bipartisan) Berhubung Pelaksanaan Umur Pengundi dan Calon 18 Tahun serta Pendaftaran Pemilih Secara Automatik pada 3 Oktober 2019;
- (ii) Sesi Libat Urus Dengan Pertubuhan-Pertubuhan Bukan Kerajaan dan Parti-Parti Politik Negeri Sarawak pada 26 November 2019; dan
- (iii) Sesi Libat Urus Dengan Pertubuhan-Pertubuhan Bukan Kerajaan dan Parti-Parti Politik Negeri Sabah pada 3 Disember 2019.

Melalui penganjuran sesi-sesi libat urus tersebut, SPR telah memberi penerangan mengenai perancangan pelaksanaan pindaan undang-undang yang telah diluluskan serta mendapatkan maklum balas dan pandangan daripada semua pihak.

Di samping itu, SPR juga sedang bekerjasama dengan Jabatan Pendaftaran Negara (JPN) melalui **Jawatankuasa Taskforce SPR dan JPN** dalam persiapan melaksanakan pendaftaran pemilih secara automatik dan urusan-urusan lain yang berkaitan. SPR menjangkakan semua persiapan yang sedang diambil tindakan akan dapat disiapkan dalam tempoh **18 hingga 24 bulan dari tarikh kelulusan pindaan oleh Dewan Negara pada 25 Julai 2019** yang lalu. Tarikh pelaksanaan tersebut dijangka selewat-lewatnya adalah pada bulan **Julai 2021**.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : TUAN SIM CHEE KEONG
[BUKIT MERTA JAM]**

TARIKH : 28 JULAI 2020 (SELASA)

SOALAN

TUAN SIM CHEE KEONG [BUKIT MERTA JAM] minta **MENTERI KESIHATAN** memberikan pecahan perbelanjaan RM500 juta yang diperuntukkan kepada Kementerian bagi melawan COVID-19. Mengapa berlaku kekurangan PPE seperti yang dimaklumkan oleh KP Kesihatan pada 13 April 2020.

JAWAPAN

Tuan Yang di-Pertua,

1. Kementerian Kesihatan Malaysia (KKM) telah menerima **peruntukan khas secara berfasa** daripada Kementerian Kewangan. Sehingga Julai 2020, **sejumlah RM1.005 bilion** telah dikhaskan untuk tujuan pencegahan dan rawatan COVID-19. Daripada peruntukan tersebut, sehingga Julai 2020, Kementerian Kesihatan telah **membelanjakan sebanyak RM650** juta melibatkan pembelian peralatan, konsumable dan *Personal Protective Equipment* (PPE), bekalan perubatan, *test kit* dan reagen bagi ujian saringan, termasuk lantikan kakitangan kontrak dan bayaran elaun COVID-19 kepada barisan hadapan dalam mengawal dan merawat COVID-19.
2. Merujuk kepada Kenyataan Ketua Pengarah Kesihatan pada 13 April 2020, kuantiti PPE hanya mencukupi untuk tempoh dua (2) minggu sahaja adalah **bermaksud kepada stok bekalan sedia ada pada masa**

tersebut, namun begitu pembekalan adalah dilaksanakan secara beperingkat. Peningkatan keperluan yang mendadak di seluruh dunia telah menyebabkan berlakunya masalah kekurangan bekalan PPE secara global. Berdasarkan pemerhatian terhadap pola penggunaan PPE di fasiliti kesihatan KKM, terdapat peningkatan ketara antara 2 hingga 10 kali ganda bagi penggunaan PPE.

3. Justeru Kementerian Kesihatan telah melaksanakan **pelbagai langkah mitigasi** bagi mengatasi masalah ini termasuk memantapkan koordinasi rangkaian bekalan di fasiliti KKM melalui pelaksanaan **perolehan darurat** secara berpusat serta mengadakan **kolaborasi dengan pihak pengilang** dan pemegang taruh berkenaan bagi memastikan bekalan PPE yang berterusan untuk barisan petugas hadapan. Dalam masa yang sama, Kementerian Kesihatan juga telah menerima pelbagai sumbangan PPE dari pihak-pihak yang prihatin dengan isu kekurangan PPE.

4. Pemantauan harian dilaksanakan secara berterusan melalui sistem pelaporan dan pangkalan data atas talian bagi memastikan bekalan di fasiliti kesihatan Kementerian Kesihatan (hospital dan klinik kesihatan) tidak terputus. Sehingga kini jumlah *stockpile* di institusi-institusi kesihatan KKM telah melebihi untuk tempoh tiga (3) bulan.

5. Kerajaan juga akan sentiasa memastikan peruntukan kewangan yang mencukupi dalam memastikan wabak COVID-19 dapat diuruskan dengan baik dan terkawal.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : YB TUAN WONG KAH WHO
[IPOH TIMUR]**

TARIKH : 28 JULAI 2020 (SELASA)

SOALAN

YB TUAN WONG KAH WOH [IPOH TIMUR] minta **PERDANA MENTERI** menyatakan apakah status penggubalan Rang Undang-Undang Perkhidmatan Parlimen (*Parliament Services Bill*) sebagai sebahagian daripada usaha pembaharuan Parlimen dalam sistem demokrasi negara ini.

**JAWAPAN : (YB DATO' TAKIYUDDIN BIN HASSAN, MENTERI DI
JABATAN PERDANA MENTERI)**

Tuan Yang di-Pertua,

Untuk makluman Ahli Yang Berhormat, draf Rang Undang-undang Perkhidmatan Parlimen telah disediakan. Kerajaan sedang meneliti dan memperhalusi penubuhan Suruhanjaya Perkhidmatan Parlimen Malaysia.

Sekian, terima kasih.

**PEMBERITAHUAN PERTANYAAN DEWAN RAKYAT,
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : DATUK SERI PANGLIMA MADIUS (TUARAN)

TARIKH : 28 JULAI 2020 (SELASA)

SOALAN

Minta **MENTERI PERTAHANAN** menyatakan apakah langkah-langkah yang telah, sedang dan akan diambil untuk memastikan agar keselamatan rakyat Malaysia di Sabah terjamin daripada ancaman-ancaman luar dan apakah cadangan supaya Kem Tentera Lok Kawi dipindahkan ke Pantai Timur akan dilaksanakan.

JAWAPAN

Tuan Yang di-Pertua,

Kementerian Pertahanan sentiasa memandang serius tentang isu keselamatan negara dan ke arah itu, pelbagai usaha telah dan sedang dilaksanakan untuk memastikan kedaulatan negara terus dipelihara daripada sebarang bentuk ancaman. Sejak berakhirnya Operasi DAULAT pada 29 Jun 2013, Angkatan Tentera Malaysia (ATM) telah meneruskan usahanya untuk memperkukuhkan pertahanan dan kedaulatan negara termasuklah di negeri Sabah.

Bagi memastikan keselamatan rakyat di Sabah khususnya di Pantai Timur Sabah terjamin daripada ancaman-ancaman luar, ATM bersama Pihak Penguatkuasaan Maritim Negara telah meningkatkan keupayaannya sebagai langkah menghadapi sebarang kemungkinan. ATM ketika ini, masih mengekalkan atur gerak trup dan aset dari ketiga-tiga Perkhidmatan, iaitu Tentera Darat Malaysia (TDM), Tentera Laut Diraja Malaysia (TLDM) dan Tentera Udara Diraja Malaysia (TUDM) sebilang masa (24/7) dalam memperkukuhkan kawalan keselamatan di Kawasan Tanggungjawab (KTJ) daripada dibolosi penjenayah rentas sempadan atau ancaman-ancaman yang lain serta memperagakan kehadiran (*show of presence*) bagi mencegah sebarang ancaman keselamatan.

Aset-aset ATM yang sedang beroperasi di negeri Sabah terdiri daripada beberapa Batalion Infantri, Kompeni *Parachute* dan Kompeni Mekanize TDM, aset-aset TLDM termasuk Pangkalan Laut, aset-aset TUDM dan Pasukan-pasukan Khas daripada ketiga-tiga Perkhidmatan ATM.

Negara kita turut memeterai persepakatan dengan Filipina dan Indonesia melalui perjanjian *Trilateral Cooperative Arrangement (TCA) on Immediate Measures to Address Security Issues in the Maritime Areas of Common Concern* pada 14 Julai 2016 bagi kerjasama menghalang atau menghadapi ancaman keselamatan serta jenayah rentas sempadan di kawasan perairan Laut Sulu dan Laut Sulawesi.

Bagi cadangan perpindahan Kem Lok Kawi, pihak ATM khususnya Tentera Darat melalui Pelan Strategik Tentera Darat telah memperkukuhkan Divisyen Ke-5 Infantri yang sebelum ini dikenali sebagai

Task Force 450 dan telah ditempatkan di Kota Kinabalu untuk memerintah 3 buah Briged Infantri di seluruh negeri Sabah seperti berikut:

1. **Keselamatan Pantai Barat Sabah.** Briged Ke-5 Infantri yang berada di Lok Kawi telah dipindahkan ke Kota Belud untuk mengawal keseluruhan keselamatan Pantai Barat Sabah. Pembinaan kem baru sedang dilaksanakan.
2. **Keselamatan Pantai Timur Sabah.** Briged Ke-13 (ESSCOM) yang telah ditukar nama menjadi Briged Ke-13 Infantri berpangkalan di Cenderawasih, Lahad Datu untuk mengawal keseluruhan keselamatan Pantai Timur Sabah. Pembinaan kem baru sedang dilaksanakan.
3. **Keselamatan Sempadan Daratan Sabah/Indonesia.** Briged Ke-32 Infantri dirancang ditubuh baru dalam RMK 12 di sekitar Pensiangan, Kalabakan dan Tawau untuk mengawal keseluruhan keselamatan sempadan daratan Sabah/Indonesia. Pasukan 8 RS telah dipindahkan dari Kem Sungai Rait, Miri ke Kem San Shui, Tawau.

Bagi penempatan kem tentera, tiada lagi rancangan perpindahan ke Pantai Timur, Sabah. Semua kem yang ada akan kekal sebagaimana di lokasi sekarang. Keselamatan di Pantai Timur akan dikawal selia oleh Briged Ke-13 Infantri yang berpangkalan di Cenderawasih, Lahad Datu.